

【阿啾箭个故鄉】(龔萬灶原作/馮美齡修改)

「鷓婆來哩啲！鷓婆來哩啲！」

落雨過啊忒，天頂頂个烏雲還毋想散，正變較淡兜仔，無恁烏咁。半天仔就有一隻烏影，像擎等兩支巨扇，攞一路來。一下仔又像烏色个大揚尾仔，在頭那頂，緊飛緊兼。

阿森仔在田頂擲稗仔，看啊著，喊一路轉。

伙房項逐家人就有畜雞鴨。禾頭田，掌草過後，青溜溜仔。大家就捉鴨子來放，一直放到禾仔飽胎，鴨子也變到鴨臀仔，就做毋得再放咁。田頂無水个時節，雞嫲乜會帶雞子落去絡食。滿田鴨子、雞子，盡驚鷓婆來吊。

耕種人對這種「天頂飛來个災禍」，心肝肚又恨又驚。屋下係堵好有放鴨子抑係有雞嫲子，歸日仔就看等天頂，竹頭尾、雲底下係有看著一息仔烏點，跔等對門直出，擎等雞祛，走到田頂去掌等。

大家像講同咁樣仔，有麼儕先吊睨著「半天仔」，定著會大聲通報。

伙房背後，竹頭圍肚該頭苦棟樹頂，有一竇阿啾箭，歸身仔黝烏，飛等像射箭恁遽。阿啾箭看著鷓婆就像看著不共戴天个大冤仇人，遠遠就逐過去，用厥尖尖个觜仔對等鷓婆，密密啄落去，啄到鷓婆佇毋著，拔等翼胛，趕緊飛走。

阿啾箭逐朝晨就異早跔，齶齶啾啾，吵人清夢。毋過，佢在農家人个心肝肚，係好烏仔，就像「空中警察」樣仔，盡忠心來保護等田

項个鴨子雞子。雖然講著等歸身仔个烏衫烏褲，大自家乜毋會忌諱。堵著做田个時節，田頂會杪出異多蟲豸草蟻；阿啾箭會飛來絡食，企在牛背囊項，不時像噴射機樣仔，種到濫泥面項，啄一口青蟲大餐。邊脣仔，輒常會堵著厥个好鄰舍——歸身仔雪白个白鶴仔，腳棍長，頸根也長，行起路來，腳步乜長，像一位紳士。田坵項一烏一白共樣係駛牛阿伯个好朋友。

「阿啾箭，尾砵砵，崑背叔婆做生日，愛分偈跔抑毋分偈跔，害偈打扮兩三日。」從細就聽阿姆唸這條童謠，對阿啾箭一直就有異多个憧憬；在大人該位接續著个印象。阿啾箭變到乖巧又帶有一息仔可憐个細阿妹仔。離開家鄉過後，有時會在電線頂頂看著阿啾箭，本本係一身个烏袍，共樣个利觜，單單缺少青油油仔个竹園邊脣，擎等牛拂仔頭磬磬仔犁田个阿伯，心肝肚像失落忒麼个東西樣仔。

阿姆既經過身，毋過，老人家背囊項揸等孫仔，手項擎等雞祛，掌等一竇雞嫲子，不時還愛臥頭看天頂个身影，還係清清楚楚印在心肝肚。

【菜瓜棚】(江嵐原作/馮美齡修改)

屋側角有一搭空地，阿公手仔就種有一頭番樣，這下當高當大頭，逐年正月就開花，一點一點黃黃像星仔屎樣仔，歸串歸串仔撈撈，毋使到五月節，一粒一粒像細人仔个拳頭嫵恁大个番樣，打到婆嫵泊叔，係落一陣仔大雨就會跌到一樹下，青个拿來滷「情人果」，黃个就做得食。土番樣細細粒仔，無麼个肉，毋過，味緒特別香，係一般改良个也係進口个大番樣，無法度比个在地香，阿公無愛食大大粒有肉又多水份个進口種，總係頭望望仔等佢自家種个番樣熟。

菜瓜棚脣項，有一頭木瓜樹，毋記得係麼个時節種个，逐年就打到結結，食就食毋利，阿姆盡盼得，時時就摘下來送鄰舍。

逐年正月，阿姆就會點幾頭仔菜瓜籽，等生出菜瓜苗个時，愛選兩頭盡靚个做種，伸个做盡愛擲淨淨，兩日淋一擺水，等菜瓜遞藤該時，還愛插兩枝豆隸分佢遞上架仔頂。四月邊仔就開始打花，大大蕊黃黃个花，在青溜溜仔个菜瓜葉裡肚，開到脫體晟眼，到五月邊仔天時較熱，花就會打來忒多，影響菜瓜个品質，阿姆就會將有兜仔花摘忒。莊下人無耗爽个本錢，阿姆會將這兜大大蕊个黃花，拿來搵麵粉落鑊焗，對佢這兜罕得有麼个零嗒好食个細人仔來講，食起來脆脆香甜甜个味緒，有日頭轟同萋萋个菜瓜花香，恁樣个零嗒驚怕係佢兜一生人就擢毋忒个記憶。

放暑假个時節，菜瓜打到滿棚吊晃槓，菜瓜葉同油桐葉異像，大大葉青青，生角生角，一皮一皮仔重重疊疊，對瓜棚下背看啊上，盡

像一粒一粒大大粒个星斗，黃色个花就像係光華華个月光，一條一條个菜瓜浸青，就像係得人惜个細人仔，在該吊晃槓。旨結婚个細叔仔係教書先生，佢盡會利用這種天然个資源，兜一張矮桌仔，幾張矮凳仔，歸日仔就在這讀書泡茶，到暗晡夜，菜瓜棚下自然變做大人細子寮涼个所在。成時坐到月光下，看月光華華，滿天星斗，清風輕輕仔吹過來，阿叔會教佢兜唸：「月光華華，細妹煮茶，阿哥兜凳，人客食茶……」个童謠，還會同佢兜講盡多盡多个故事。

八月半係佢們團圓个大日仔，阿叔、叔姆、阿姑、姑丈，出外做頭路个人，歸家人就會渡轉來過節，大家坐在菜瓜棚下食月餅打嘴鼓，叔姆同阿姑在該起火焙肉，細人仔在禾埕項逐上逐下，搞到貶轉來，歸屋間歸禾埕个笑聲，係佢兜用錢就買毋著个幸福經驗。等八月半過忒，一家一家人愛駛車去都市个時節，吾姆總會細心細意摘一千擔菜瓜、番瓜、匏仔、青菜，一樣一樣用報紙包好勢，還有自家畜來刷个雞仔、鴨仔，鹹菜、覆菜……塞塞摯佢兜一車頂。

有一暗晡，佢發夢著驚跋跣起來，就順續出去菜瓜棚側角个便所屙尿，看著阿公坐在瓜棚下，毋知同麼儕在該位講話，遠遠就聽著吱吱喳喳个人聲，等佢行近看啊，就單單阿公一儕定定，脣頭矮桌仔項放等一臺錄音機，肚項傳來八月半，歸家人共下圍等瓜棚下，食月餅打嘴鼓个笑聲。

【阿婆畜个壁蛇仔】(江嵐原作/馮美齡修改)

讀小學个時節，見擺避暑阿姆就會帶佢兜轉去姐婆屋下寮，姐婆屋下係一間三合院个伙房屋，正身係人客廳，又也係服祀阿公婆个所在，右片析係阿公阿婆个間房，左片析係大舅大舅姆个間仔，再過去就係灶下。阿姆頭擺个間房在右片析橫屋个所在，故所佢兜逐擺轉來本本歇在這隻間房。

屋前个禾埕項，毋係曬一千擔番薯籤就係放樵放杈。朝晨頭跣起來就會看著禾埕肚項，雞嫵帶雞子在該絡食，下把仔會看著黃狗牯逐鵝仔，逐到啲啲滾，屋側角有幾下隻牛屎粘在該鑽地泥，屋簷下還做得看著蝠婆仔踇在該睡目，燕仔个泥竇就起在人客廳適中，在屋簷下行過，還愛細義莫分燕仔屙著屎正好，吾姆逐擺就會喊阿公同燕仔竇拆忒去，阿公總係講燕仔作

竇會帶來平安福氣，故所，毋管阿姆仰般撬就無效，該隻燕仔竇本本好好無徙位。

暗晡頭就會看著窗仔門邊爬上爬下个壁蛇，兩三十公分長，淺灰色个皮，長長个尾，阿哥講該係「單臉个冷血動物」。佢兜在屋頂橫梁項爬來爬去，下把仔也會失腳跌下來，係堵堵好跌到被單項，佢同阿姆就會哇哇滾啞啞喊，阿哥一息就毋會驚，還會同壁蛇个尾攞起來，無想著壁蛇嘎斷做兩節，阿哥拈等壁蛇尾還弄弄動，在吾面前換換轉，長間就同佢嚇到噉，等佢嚇到噉噉滾該時，阿姆就會開嘴罵阿哥。

佢問阿姆講：「阿婆做麼个愛畜恁多壁蛇呢？」阿哥同阿姆聽著佢恁樣問，兩儕人就笑到毋會停動，到這下就還會講來笑佢。

有一日，阿哥拿兩粒細細白白个卵分佢看，阿哥用手指擘開，肚項有黃色个卵黃，阿哥講該係壁蛇卵，佢雖然無摸著，還係遽遽去用香茶籬洗手，當久當久就毋敢拿東西食，正經拗蠻仔得人畏。又有一擺，佢跔到屋簷下捉揚尾仔，看著地泥下一粒一粒細細粒烏烏有一點白白个屎，就遽遽喊吾該隻萬能个阿哥來鑒定，阿哥講該係壁蛇屎，阿哥係吾个字典，佢上知天文下知地理，逐擺在學校就考第一名，佢係吾心肝肚項个大英雄，也係吾个家庭教師，在吾个記憶裡肚，無論麼个事情就考佢毋橫。阿哥盡惜佢，去哪位就會帶等佢去，去姐婆屋脣个菜園肚項捉金姑仔、捉花點姑仔，去田脣捉蚴仔、打草猛，搞到日落山愛轉屋个時節，還會摘一蕊花送分佢。阿哥麼个就知，麼个就識，佢試著阿哥當慶麼个就會。

阿哥同佢講北部个壁蛇毋會叫，大安河以南个壁蛇正會叫，毋係地理个關係，係因為品種無共樣个原故。佢問阿哥：「阿婆做麼个無愛同壁蛇逐走呢？」阿哥同佢講：「壁蛇係好个蟲仔，佢會食蚊仔、黃蜚……。」阿哥又講：「阿公有講過，屋肚項有壁蛇，表示這間屋係淨俐又有福氣个所在，故所壁蛇無麼个害處，毋使同佢逐走，你係無去捉佢，佢也毋會來咬你，大家做得和平共下。」

今年暑假轉來姐婆屋下，姐婆个舊屋拆忒哩，起一棟當靚个樓仔屋，暗晡頭愛睡目个時節，佢盡像還看著窗仔門外背有一條壁蛇趨過去个樣仔。

【阿婆个菜園】(江嵐原作/馮美齡修改)

阿婆个菜園有一個名仔，安到「芹菜園」。

「芹菜園」毋係因為種當多芹菜正得名，係因為阿婆个名仔安到「芹菜」。阿婆一生人毋識種過芹菜，也毋識食過芹菜，佢一路里來就認為芹菜係分人食个東西，種个芹菜總係分人食忒，故所，佢試著種自家分人食，係盡慳个事情。阿婆毋食芹菜，吾歸屋下人也做毋得食芹菜，食著芹菜就像食著阿婆共樣，係犯著大忌个事情，吾屋下討入來个心白，第一項愛知个家規就係這件大事情，一生人做毋得食芹菜。

毋種芹菜个芹菜園仰會恁出名呢？該係因為阿婆手路盡好，種麼个生麼个，仰般種仰般生，佢種个青菜總係肥肥大葉，又嫩又多水份，菜色盡靚，當得人惜。阿婆種个筊瓜、番瓜、瓠仔、菜瓜，逐項都當會開花打子，連種番豆，收成就比別人種个較好。故所佢做細人仔該央時，比別人較有福氣，食得著春夏秋冬無共樣个季節，無共樣个菜色。

甜嫩多水份个芥藍菜、莧仔、高麗菜，盡有春天个氣味，無魚無肉个童年生活，係有阿婆親手種个青菜攪豆油好食，就係盡豐沛个幸福味緒。熱天个時節，大家就熱到火氣當大，食著阿婆種个薤菜、角菜、菜瓜湯，這種降火又有營養个青菜，就做得清涼消暑過一個熱天。秋天係佢盡合意个季節，臺灣个土地總係在這個時節，滿崗滿坳，滿哪就看得著豐收个果子同菜色，除忒番豆、瓠仔、香園瓜个收成以外，菜園脣个時計果也紅到變吊菜色，兜等飯碗，食一季个秋味落肚，係

仰般个浪漫幸福你知無？

過年前个油菜花、蘿蔔仔、芥菜，毋使種到菜園肚項，田坵肚滿坵滿坪个菜色，分上家下屋个鄰舍儘採摘，食就食毋忒，阿婆燒暖个誠意，分莊頭肚項逐家人个灶下燒暖過年。

阿婆盡惜佢，逐擺帶佢去菜園做伴，毋係摘番茄分佢食，就係改薑嫲分佢帶轉去，從細就同阿婆共下睡，阿婆盡好用腳同捱夾等睡，佢係弄弄動，佢就會捏佢，練就佢這下個好睡性，愛承蒙細人仔該央時同阿婆共下睡个功勞。吾姆个圓身項有茶米个味緒，阿婆个圓身項有番薯乳个味緒，細人仔个時節佢盡惱阿婆圓身頂項个番薯乳个味緒，大姊講該係老人臊，佢同阿婆共下睡，吾圓身肚項也有老人臊，佢聽著盡譴。

這幾年仔，阿婆个菜園分阿叔賣忒咧，起當大棟个樓仔屋，阿婆坐在新屋个壁角曬日頭取暖，無人了解阿婆个心事，這幾年來也無人識看著阿婆个笑容。今年過年，桌頂項又有又嫩又萋个芥菜、莧仔、蘿蔔湯，八十一歲个阿婆，用皺皺、瘦夾夾个手，笑咪咪仔挾青菜分佢食，佢認得識阿婆種个菜，有阿婆特別个手路同香氣，燒暖又幸福个味道。阿婆分佢砵年錢該央時，佢拉等阿婆个手，問佢菜園在哪个位？阿婆像做賊分人捉著樣仔，用手指甲摺佢，喊佢恬恬。年初一打早，天旨光，阿婆就喊佢疏床，帶等佢行過幾棟大樓，來到地坵場脣項，看佢該坵細細仔个菜園，菜園肚个芥菜、高麗菜、莧仔、蘿蔔仔，種到撈撈。

佢看著阿婆个菜園靚靚个菜色，同時看著八十一歲个阿婆个春天，正起勢定定。

【老飯筍仔】 (古秀上原作/馮美齡修改)

今年轉楊梅莊下掛紙，旋旋風想愛轉老屋看啊咧，可能阿姆在天頂分佢一支蔥當棍，罵佢係不孝子，老屋幾年來無轉去拚掃吔！打開老屋個大門，正想起阿姆在世時節交代過，阿姆講：「阿上牯！毋管你仰般無閒；仰般賺錢，臺北歇等仰般派頭個屋仔，還係愛記得莊下有一間偲兜個老屋，你定著愛輒輒轉去拚掃淨俐。」三十零年來，佢總係恹毋解，無人歇個老屋，拚掃有麼個意思？毋過等佢拚到間肚個舊篋筍櫥仔，看著裡肚有一條轉黃個大手帕仔，包等一隻老飯筍仔，打開老飯筍仔，看著裡肚裝等淄淄，佢還細時節翕個轉黃個老相片，佢總算尋著三十零年來恹毋通個答案。

還記得做細人仔個時節，有一日先生交代，天光日開始愛帶飯筍仔。放學後遽遽飄轉屋下，黏時同阿姆講。第二日阿姆撚一隻包烏糖個飯團愛分佢帶去學校。佢譴到會死，仰會阿哥同阿姊有飯筍仔，佢就無飯筍仔好帶。

該朝晨佢無食朝就走去學校。連續四節課佢心情當毋好，同學看佢面臭臭仔，無人愛插佢。第四節下課，偷偷仔走去運動坪嘶骸另命。無幾久，看著楊先生帶阿姆來尋佢，阿姆手項攞等一隻新飯筍仔。佢打開飯筍看著有菜脯卵，暢到奈毋得。乜毋管阿姆恁生趣，緊同先生會失禮，開始拚命食佢個飯筍仔。

隔日上第一節算術課，古春枝先生來到教室肚，佢講：今晡日毋使上課，愛來講古分大家聽，大家歡喜靈天，乖乘坐等聽先生講古。

古先生講：佢熟識一個當煞猛又省儉個阿姆，為著細人仔無飯筍仔好用，跔工核等一擔竿個菜，來來去去行吔十二公里個路頭，無著鞋個腳行著溜皮吔！肩頭個皮核到烏青吔！辛苦種菜賣就係為著分俵仔買一隻新飯筍仔好用；乜為著驚細人肚飢，偷剪一坵阿公個私菜仔……菜脯卵分俵仔食，嗶分阿公誤會，話著心白緊煮菜緊偷食，害惜子個阿姆無晝好食。毋過佢還係滿心個歡喜，因為厥俵仔個飯筍仔食淨淨。這個偉大個客家女性，大家知係麼儕無？佢就係阿上牯厥姆。聽過這古以後，佢一生人食著簡單。

民國六十二年上臺北讀高中後，飯筍仔乜跔等退休吔。有一日放寮轉老屋，看著老狗仔食個碗公缺角壞忒，分佢想著退休個老飯筍仔，問阿姆老飯筍仔還在無？係還在，做得分老狗仔用無？阿姆笑面回佢講：「老飯筍仔另有用途，做毋得分老狗仔用。」佢想阿姆一生人勤儉，可能驚打爽，無愛分老狗仔用。

三十零年後個今晡日，佢正知老飯筍仔從來毋識退休，因為老飯筍仔裡背肚裝等淄淄阿姆對佢個痛惜。雖然阿姆這下過身吔！毋過佢對佢個掛心永久都毋會退休。生活中盡多佢無在意個東西，就像老飯筍仔、老相片共樣，隨手一捋像地圾樣，毋過對阿姆來講：這兜東西就係佢一生人個寶。因為佢個愛全部裝在老飯筍仔裡肚。佢一生人煞猛打拚賺錢，認為錢正係寶，毋過等阿姆過身後，正打醒佢，正正個寶係阿姆，毋係錢，唉！世俗事；世俗眼、世間物；世間情，有幾多儕知正正個寶係麼個？人總係愛等到知時，寶早就無在身邊哩！

【過年】(龔萬灶原作/馮美齡修改)

中國人个「過年」係一年當中盡大个節日，看來盡重，過來盡鬧熱。各行各業个人，對尾牙起事，家家屋屋就準備過年。耕田人，一年透天就無閒泊杈，盡望就望過年个時節，有幾日仔好奈，又有豐沛好食。生理人到咗年下仔也盡無閒，又愛做生理，又愛收數，還愛款好「紙票」，等上手个貨主來結數。開工廠个大頭家，想著過年愛發恁多「年終獎金」，逐日就額結結仔。

毋過，話雖然係恁仔講無毋著，到咗過年个時節，耕田人一年个辛苦，也既經有好个收成，割多割少，總算一年也圖過來咗。生理人無閒歸年仔，賺多賺少，也係一個段落。新个一年，有新个氣象，新个希望，故所，到過年个日仔，大家就愛暢暢樂樂，有一個好个新年頭，過忒年正會有好个頭彩。

中國人係一個敬天念祖个民族。今晡日，有好食好著，係上天个庇祐，祖先个福蔭；到過年過節，就愛刷雞拵鴨，敬神明，拜祖先；尤其係過年，有盡多規矩，表示對神明、祖先个尊敬，做毋得濫糝冒犯。

客人過年，祖先傳下來異多風俗、往語，總係想愛求一個吉利。對年二十五八年駕開始，就算過年；開始辦年貨，蒸版仔。一八年駕就愛先看一隻日仔蒸甜版，係一件大事；甜版係蒸來順利，蒸來靚，來年就萬事順利；較講究个人家，蒸甜版愛選吉日；因爭蒸甜版愛蒸歸日仔，一下無注意就會蒸毋熟。記得頭過，阿姆蒸甜版，從頭到尾

就當緊張，逐樣東西在朝晨頭打早就準備齊全；一再吩咐細人仔毋好濫糝講話，盡好莫入來灶下；有身項个婦人家絕對做毋得行兼；偈還看著阿姆在灶頭面放著茅茛草並一撮米；對打早開始蒸，大約愛到半下晝過正蒸得好；阿姆歸日仔在灶下掌等，鑊下火愛保持一定个熱度，鑊底水愛時時看等，毋罅就愛跔等添加。甜版蒸好，愛到年三十日拜阿公婆正開床，切一角砵神桌。

甜版蒸好，接等陸陸續續蒸鹹版仔、蘿蔔版、發版，還愛做發包仔，有兜人家還愛打紅版、丁仔版。

到年三十日以前，愛做个事情還盡多。上早，愛礮穀、打米，準備過年个米糧；下後，愛揀穀到精米所去精變白米；愛準備牛草、豬菜，過年該日做毋得做事，逐項事情就愛先做好勢來。

大拚掃也係過年个大事情，過年該日做毋得掃地泥，財氣會掃忒，故所，一八年駕，大人就開始吩咐，哪仔愛先拚，哪仔愛拚較淨俐兜仔；逐年，偈還愛負責清香爐，香爐做毋得儘採移徙，愛到年三十日正做得搬下來清洗。先準備一張較大張个紙，攤在地泥項，香爐搬下來，將肚項个香灰倒在紙面項，香爐用水洗淨來，香灰用篩仔篩過，較淨个香灰倒轉香爐肚，裝八分恖，再將神桌抹淨來，墊香爐个壽金換過新个，清爐个工作就完成哩。再來係門窗戶扇，過時个門對仔、門紅、門符等等，全部愛清淨來，換過新个。

盡慢年二十九就愛刷「頭牲」，過年愛用異多牲儀，拜天公、拜阿公婆、拜伯公、拜城隍爺，全部愛雞鴨湊牲，輒常愛歸晝邊正搵得好。

## 99 年全國語文競賽臺灣客家語朗讀(北四縣腔)國中學生組 編號 7 號

### 【過年】 (龔萬灶原作/馮美齡修改)

年三十日，讀書人開始寫春聯，廳下門貼一對同自家堂號相關个吉祥話，無就寫兜迎春納吉个好話；耕田人有畜投生，牛欄門貼一句：「水草長春」，豬欄下貼一句：「大武興旺」，礮間下貼一句：「川流不息」，雞栖門貼一句：「六畜興旺」，穀倉門貼一句：「積穀盈倉」，米缸頂貼一隻「滿」字，廳下門扇一片貼：「天寶」，一片貼：「物華」；門楣貼「五福」門紅，廳堂門貼五張，間門貼一張，神牌面頂貼五張；各間門个兩片門企仔頂貼「門符」；大門頂愛插一支桃柗。

年三十日打早，家家戶戶就愛敬天公，尤其耕種人，看天絡食，敬天公表示對答謝上天一年來个庇祐，也希望過忒年本本有好个收成。客人旦勢務農為生，過年敬天公係當重要个事情。敬天公，大體仔在子、丑、寅三隻時辰，故所，逐年二十九暗晡，到半夜仔，紙炮仔砰天砰地，過年个氣氛就當重哩。敬天公个頭暗晡愛食一餐齋，選吉時在天墀坪擺香案，當天祭拜，神桌分上、下界，上界祭品用齋果，五燥、五溼、金蓮座、金靠、天金、壽金、長錢、香燈茶酒、甜版、丁仔版等；下界祭品用葷腥，香燈茶酒果品，五牲或三牲，紅版，壽金。上界神桌用一張八仙桌，四隻腳用兩張長凳墊高起來，後背連等放加一張八仙桌，做下界。上界該張桌愛圍桌圍，點蠟燭。上、下界各一付香爐、茶杯、酒杯。壽金摺金靠，用籬箕裝等，放在上界桌下長凳頂，金蓮座放在香爐兩片，長錢兩付吊在上界个兩片桌角。點香禮拜該時節，愛全家到齊，由戶主帶頭，一屋下人全部企在戶主後背

跔拜，祝告天公，祈求風調雨順，保佑一家平安。酒過三巡，焚燒金紙，先燒天金、壽金、金蓮座，再將金靠倒落去，火盡猛个時節，將長錢用竹篙撐等，放落去燒，灰躉順等火尾衝上天頂，直達天庭。金躉旨過，將供奉个酒淋落去，就做得打紙炮仔哩！紙炮仔在夜空中，火星仔滿天四散，象徵明年金光燦爛，順利如意。其實，敬天公係中國人感謝上天个儀式同心意，係異醇厚个風俗，世代相傳，透過這種儀式，分後代子孫知得，人在世間求得生存並毋係異容易个，愛時時存有感恩个心情，感謝上天，感謝廣大對僇有幫助个人群。

三十日愛拜个神明，除忒拜城隍爺，定著愛拜伯公。記得還細時節，阿姆會帶僇去屋背伯公廟拜伯公，伯公廟用石枋框起來，矮矮細細隻仔，後背一頭大榕樹，阿姆講，該係伯公樹，定著毋好跋上去，係跋上樹頂，該暗晡就會拉尿。阿姆拜好伯公，轉屋下將該牲儀拿到眠床前，擺在凳頭頂，點香拜床公婆，乜有燒金，阿姆講，拜床公婆，暗晡頭細人仔較好睡，較毋會著驚。

年三十暗晡，出外做頭路个子孫，全部就愛轉屋下團圓，共下食團圓飯，平常較少食个肉氣，在這餐做得盡食。食飽夜，細人仔坐等，肱喲喲仔，等大人發砵年錢。理家个戶長，愛對這一年來，屋下人辛苦工作，做一個獎勵，越辛苦越煞猛个發越多砵年錢。細人仔除忒買新衫、新鞋乜有發砵年錢。逐擺，阿姆看著細人仔拿著恁多「紙票」，就會再三吩咐，毋好亂使，愛留來註冊、買鉛筆同字簿仔。

【過年】(龔萬灶原作/馮美齡修改)

砵年錢分過咗，阿姆會同大家講：「天光日愛用个東西，暗晡夜，全部愛先拿出來，天光日年初一做毋得開箱櫃、打拖箱仔、開米缸；煮飯个人愛記得，天光日歸日仔食个飯，米愛先量便，飯先煮好來，年初一做毋得煮飯，蒸飯就做得；天光日愛著个衫褲，等下就先拿出來。」佢問阿姆：「做麼个過年毋好打拖箱仔？」阿姆講：「過年該日，愛將財神爺留在佢个屋下，過忒年，佢屋下正會大賺錢；你係打拖箱仔、打米缸，財氣就會走忒。」阿爸乜同佢兜講：「三十暗晡，毋好有狗吠，過忒年正較無賊仔。」佢想，係毋係年三十暗晡，大家在屋下過年，外背既經無人行路，連賊仔也轉屋下過年咗，狗仔就放棄囉。

客人在年初一朝晨打早，愛拜阿公婆，請祖公祖婆共下來過年，神桌項愛擺盡多糖果、糕仔、酸柑、黃梨、甜版，安到「砵神桌」。年三十日下晝也有拜一到阿公婆，安到「送舊年」，初一朝晨再拜，安到「迎新年」。阿公婆拜好，差毋多就天光哩，灶下開始準備食朝。客人在初一朝晨食一餐齋，愛煮芹菜，全家食哩，勤勤儉儉；食豆腐，全家萬富。食晝該餐，愛食蔥，正會聰明伶俐，愛食蒜，正會較識算，愛食韭，正會長長久久。食飽朝開大門，阿爸會先吩咐，出行愛對哪隻方位正係大吉大利。

年初一，大家見面就歡歡喜喜，做毋得罵人，做毋得講了詔話，大人乜做毋得罵細人仔；做毋得睡眠床，會崩田坎；做毋得掃地泥、洗衫，財氣會掃忒、洗忒。朝晨頭，到附近寺廟、伯公下燒香，請神

明庇祐，帶來一年好運。

年初二，心白轉妹家；嫁出去个妹仔並婿郎也會轉來，外孫轉來向姐公姐婆拜年，姐公姐婆發紅包，分孫仔、孫女乖乖會大。這日毋好講毋吉利个話，做得掃地泥，旨好抔地圾，先掃到門角項。

年初三，係送地圾个日仔，打早就愛踴起來掃地泥，逐間就愛掃，對裡背掃往出，抔歸堆；門企仔貼个門符、大門項个桃柁，全部擘忒，同地圾收共下，用舊畚箕裝等，並一支舊掃把，送出門外田棚、圳溝脣、河壩脣，先點香、燒金、打紙炮仔，再將地圾連畚箕、掃把共下放火燒，安到「送窮鬼」。

年初五，出年駕，朝晨踴起，點香、燒金，砵神桌个祭品，全部收起來。大部分人就在這日開工開市，邁向新个一年。